

# 1 Koliniti

*Bolou Koliniti ekalesiaho ko hisalianu.*

<sup>1</sup> Dau di ivilike Bolo. Dilavau au isivimo di hohavoge di Iesu Keliso abostolo holisi lovive vama. Da isi nahie haoka mole Soseteni noeabulike levaleva ko laheho hanavoma. <sup>2</sup> Dilava ataeau Koliniti oe umale lahehoike no ko hanavoma. Dilavau la hohavei isiviale la Iesu Keliso ata holisi vaveve nahate vai. Kemoike no laheho levaleva ko hanavoma. Isi ataeau oleve keve nahie Kosive Iesu Keliso ke ivi hoesehavomale kebia bahatahoike no hoto ko hisaliai hanavoma. Iesu keu kebia bahata isi nahi bahatae Kosive. <sup>3</sup> Di isivialeike nahie Mama Dilava isi nahie Kosive Iesu Keliso keau la huhuevei la hoesegevege lana ue dua vave.

*Dilavau Iesu Kelisomo la hoesegevenu.*

<sup>4</sup> Di vani bahata laheho guliguliai Dilava imihama. Kosealemo keu Iesu Kelisomo la huhuevei la hoesegevenu. <sup>5</sup> La Iesuluvuta igaetolahale kemo Dilavau la vaveve bahata hoesegevege la kemo lulele baluga malei hotove louma. <sup>6</sup> Di subuta Keliso hoto loui la haiveale keu la uvumo u tumutumuanu. <sup>7</sup> Katealemo laeau nahie Kosive Iesu Kelisou lohoveve ke hemei umale kemo Dilavau la hoesegevei au lovi vaveve vuvune laovenu. <sup>8</sup> Auna la negotievelage vanie gabila nahie Kosive Iesu Keliso keu lohoge vaveve toelabeu bae laemo ulivebene. <sup>9</sup> Nahi hilokage Dilavau la negotieveho louale ke auna vai. Dilavau la hohavei isivialeike la move Iesu Keliso nahie Kosive keluvuta igaetolahai ui.

### *Ekalesiaeau mole tasalieveale*

<sup>10</sup> Di haokuvuia, nahie Kosive Iesu Keliso ke ivimo di la namigevema. Lainaho mole tasalievei uvu abuialive. Isito la bahata uvu igaeave. Lana katelahaliege igaetolahai huhuihuhui igae vageve. <sup>11</sup> Di haokuvuia, Koloe omo umale ata degomoleau di namihage di hilokage la moleho itumue hoto loui mole aiogevema. <sup>12</sup> Di louale keu koseanu. La degomoleau loui kosea, “No Bolo ehovama.” Ige la degomoleau loui kosea, “No Abolosi ehovama.” Ige la degomoleau loui kosea, “No Bita ehovama.” Ige la degomoleau loui kosea, “No Keliso ke ehovama.” La hoto kateale louge keu toelanu. <sup>13</sup> Di la namigevema. Kelisonike la tasalievenu. Mena la huhuige Bolo danike laheho idie domo hatinu. Lana di ivimonike babatisolahalu.

<sup>14</sup> Di kateholinu. Di la babatisogeveholinu. Isito Kilisibasi isi Gaiasi ata abuita ke unaha di babatisogevenu. Di ata moaga babatisogeveholiale keu duave. <sup>15</sup> Kosealemo labeu bae koseale loulivebene. “Noeau Bolo ivimoike babatisolahalu.” <sup>16</sup> Di huhuige di ata moaga babatisogeveholinu. Isito di ata abuita kebia babatisogevei Sitevanasi omo umale kebiata babatisogevenu. <sup>17</sup> Ata babatisogeveho Kelisou di hanavoholinu. Isito hotove dua loulihoike au di hanavonu. Keu isiviholialeike di atae lulelemo hoto ke louliho. Dana kateige Kelisou idie domo hatiale ke vuvuneu bae daemo ulivebene.

### *Iesu kemo Dilava vuvune isi luleleveu ua.*

<sup>18</sup> Ata oleuoleu evioholisito hatihatie humahala timale keau Kelisou idie domo hatiale hoto kemo

luleleholisi huhulahai loui avoe, “Momae hotoike.” Isito nahiau ukolikolie humahala timale nahi hilokage hoto kemo Dilava vuvuneu ua.

<sup>19</sup> Bukae hotomo Dilavau loui avoe,

“Dana luleletebiammo luleleabe malege auna uo-  
holisi.

Isi ataeau abu lulelemo ono vade vamale ke dana bamui.”

<sup>20</sup> Dilava hoto kemo vatae vavevemo luleleamale keabuna oleve kateai. Ige vatae vaveve huhulahai kemo lulelelahamale keabuna oleve kateai. Dilavau nahie haivege nahi hilokage vatae lulele keu momae vaveve.

<sup>21</sup> Dilavau au lulelemo humahadaeabe bamuge ataeau bae abu lulelemo Dilava hilokalivebene. Ataeau huhuige nahi Dilava hoto loumale keu momae hoto. Isito ata oleuoleu hoto ke evisi kemo lulelelahage Dilavana kebia malevei.

<sup>22</sup> Diue ataeau isiviai vikoe vaveve elehai hilokaito bae hoto ke ehovai. Isege Giliki ataeau hoto keho isiviholisi vatae lulele ke unaha kaovama. <sup>23</sup> Isito nahiau Iesu Kelisou idie domo hatiale ke hoto loui ata haivema. Ige Diue ataeau hoto ke evisi itumulahai isiviholilu eviliho. Isege Giliki ataeau hoto ke evisi loui avoe, “Momae hotoike.” Ata keau katelahama. <sup>24</sup> Isito Dilavau Diue ata isime Giliki ata degomole hohavege abu hilokage Keliso kemo Dilava vuvuneu luleleveti ua. <sup>25</sup> Ataeau huhuige Dilava hoto keu momae hoto. Isito Dilava hoto keu atae lulele atae hoto ke evihanu. Ataeau huhuige Dilava vaveve keu negoholinu. Isito Dilava nego keu atae nego ke evihanu.

<sup>26</sup> Di haokuvuia, Dilavau la hohaveale ke huhulahave. Laeau atae nimo luleleholisi vuvuneholisi ata baluga holioholilu. Mesoho la igae-

gaeau atae nimo katelahalu. Isito la bahata kateholilu. <sup>27</sup> Ataeau huhuige laeau momae vaveve vamalea. Isito Dilavau la tabagevei lulele laovege vatae vavevemo lulelelahamale keabuna ke elehai abu laheho hotoe toela louale ke huhulahai matilahai. Ataeau huhuige laeau vuvuneholilu. Isito Dilavau la tabagevei vuvune laoveale ke abuna elehai matilahai. <sup>28</sup> Atae nimo oleuleu vuvuneai ata baluga holimale kebia Dilavau tabageveholinu. Isito vuvuneholisi ivite holioholiale kebia Dilavau tabagevei isivialeike vatae huhuihuhuie vaveve ke bamui. <sup>29</sup> Di louale keu koseanu. Atabeu bae Dilava nimo au ebia ebagemalivebene. <sup>30</sup> Isito Dilavau nahi malevege nahi Iesu Kelisoluvuta igaetolahalu. Dilavau Iesu Keliso ke ebagemage keu nahiho lulelete ata holinu. Ige nahi kemo lulelelahai Dilava nimo inutolotoloai atae dua holige au vaveve toelamo nahie malevenu. <sup>31</sup> Bukae Hotou kemo loui avoe, “Atabeu bae au ebia ebagemalivebene. Isito Kosive ivi unaha auna ebagemai hoesehavo.”

## 2

### *Bolou Dilava lulelemo ata haivema.*

<sup>1</sup> Di haokuvuia, di subuta lae tiale Dilava hoto loui la haiveale kemo di hoto nimolete loui atae lulelemo la haiveholinu. <sup>2</sup> Di onobenobe bahata huhuholisito Iesu Kelisou idie domo hatiale ke unaha di huhuai la haivenu. <sup>3</sup> Di subuta lae tiale negoholisito vabuvabumo la haivenu. <sup>4</sup> Di lae tiale atae lulelemo la haiveholinu. Isito di Munanae Tumue vuvunemo la haivege la hilokage hoto keu seleve. <sup>5</sup> Di isiviholialeike la atae

lulelemo evievi ata holiliho. Isito di isivialeike la Dilava vuvunemo evievi ata holisi.

*Dilava lulele*

<sup>6</sup> Ata oleuoleu abu evievimo negolahale kebiaho dana lulele hoto loui. Isito vatae lulelemo di kebia haiveholinu. Isi vatae kosive lulelemo di kebia haiveholinu. Kosealemo vatae kosive kebia vuvunena uoholisi. <sup>7</sup> Katealemo di vatae lulele louholisito Dilava lulele ke louma. Dilavau subuta lulele ke mahogovage ataeau ke hilokaholilu. Dilavau subuta vata vaholisito au lulele kemo nahie huhuevei isivialeike nahi otogoe valele ke elehai. <sup>8</sup> Vatae kosiveau Dilava lulele ke hilokaholilu. Abu ke hilokavatebe abu atage Kosive ke mai idie domo hamaholilu. <sup>9</sup> Kemo Bukae Hotou loui avoe,

“Dilavau ehue otogoe olemeau abu uvu mai avuemo mavoale kebiaho onobenobe vale ke atabeau elehai evisi huhulahaholilu.”

<sup>10</sup> Bukae Hoto keu kateanu. Isito Dilavau au Munanae Tumumo nahie haivege nahi otogoe onobenobe ke hilokalu. Munanave Tumuu vaveveve bahata hilokale kemoike auna vaveveve ke loui nahie haivei. <sup>11</sup> Di louale keu koseanu. Atabeu bae au haoka vaveve bahata hilokalivebene. Isito biagena au vaveve bahata hilokai. Ke nahate atabeu bae Dilava vaveve bahata hilokalivebene. Isito Dilava Munanae Tumuu vaveveve bahata hilokanu. <sup>12</sup> Nahi vatae vavevemo luleleholilu. Isito Dilavau au Munanae Tumu hanavoge nahie malevei luleletievege nahi onobenobe bahata Dilavau nahiho vai otoveale ke hilokalu.

<sup>13</sup> Katealemo nahi atae lulelemo hoto loui ata haive halevai. Isito Munanae Tumuu nahie haiveale hoto seleve ke loui olemeau Munanae Tumu maleale kebia haivei. <sup>14</sup> Isito olemeau

Dilava Munanae Tumu maholiale keau bae Dilava vavevemo lulelelahalivebene. Isi Dilava Munanae Tumu ke vaveve bae hilokalivebene. Ata kateimale keabuna huhuige Dilava vaveve keu momae vaveve. Kosealemo Munanae Tumu male kebia unahaeabuna Dilava vavevemo lulelelahai. <sup>15</sup> Munanae Tumu male keabuna onobenobe bahatamo lulelelahai kemo hoto loui. Isito atabeu bae Munanae Tumu male kebia vaveve kaovai kemo hoto loulivebene. <sup>16</sup> Katealemo Bukae Hotou loui avoe, “Olena Kosive huhuihuhui hilokai. Olena luleleai ke haivui. Atabeu bae ke haivulivebene.” Isito nahiau Keliso huhuihuhui male kemo nahiau onobenobe bahatamo lulelelahalu.

### 3

<sup>1</sup> Di haokuvuia, di isiviai hoto mole loui la haivei. Isito la vatae vavevemo negolahalemo Munanae Tumue vavevemo negoholilu. La Keliso ehovamale kemo eseese evievi nahate. <sup>2</sup> Di subuta lae tiale isiviai Dilava hoto bahata loui la haivei. Isito la vaveveu toelage di hoto bahata loui la haiveholinu. <sup>3</sup> Kosealemo la aike sohu vatae vaveve vama. La mole vaveve elehai mole maina mai ima. Isi moleho itumulahai moleho hoto louma. La vaveve kateale vamale kemo di hilokage la vatae atae vavevemo negolahalu. <sup>4</sup> La degomoleau loui kosea, “No Bolo ehovama.” Ige la degomoleau loui kosea, “No Abolosi ehovama.” La kateimale kemo vatae atae vaveve vama.

<sup>5</sup> La huhuige Abolosi keu oleike. Isime Bolo keu oleike. Noeau ata la nahate. Noeau Dilava lovi vai la haivege la Dilava ehovama. Kosiveu lovi igaegae noevege no ke vama. <sup>6</sup> Laeau bulu nahate. Isege dalike bulu hamale ata. Abolosi keu

e omimale ata. Isege Dilavaike ke hoesehavoge ulima. <sup>7</sup> Bulu hamale isi e omimale keau baluga holioholilu. Isito Dilavau ke bahata hoesehavoale keike baluga. <sup>8</sup> Bulu hamale isi e omimale keau lovi igaeike abu ke vama. Keabuna lovie dua vage Dilavana ibinaeabe ovei. <sup>9</sup> Katealemo noeau igaetolahai Dilava lovi vamale ataea. Isege laeau Dilava bulu nahate. Isime Dilava o nahate.

<sup>10</sup> Dilavau au lovi vaveve vuvune daoale kemoike di o houmale ata holisi lovive dua vai hade negote ulvanu. Ige ata degomoleau ke golomo o houma. Di louale keu koseanu. Di isiviale la igaegae hade ke golomo nenilahai o houe dua vai. <sup>11</sup> Dilavau Iesu Keliso ebagemage keu la hade negote igae holinu. Hade ke igae golomo lana la o houve. <sup>12</sup> Hade ke golomo evievi ata degomoleau golota silivata mune duata o houma. Isege degomoleau idita kuluta o houma. <sup>13</sup> Gabie Iesu Keliso vani kela auna ata bahata vaveve elehai hilokage vaveveabe kena duavevai mena toelai. Kosealemo vani kela venena ata bahata vaveve mahoge Kelisona elehai hilokage oleteu lahanu. Isege oleteu lahaholinu. <sup>14</sup> Ataeabuna hade ke golomo o houe dua valiege vaveveabe kena venemo lahaholige keabuna abu vavevemo ibina malei. <sup>15</sup> Isito atabe vavevena venemo lahai uoholige keu bae au vavevemo ibina malivebene. Ata mole ona lahage kunaive bahataeabuna ladevesege auna ada unahala ui. Iale ke nahate ata mole vavevena venemo ladevesege ata kena ada unahala ehue tai.

<sup>16</sup> Lana hilokaholilu. Laeau Dilava oe tumu holige Munanave Tumuu la uvue uma.

<sup>17</sup> Katealemo ata olena Dilava oe tumu aiohavoge

Dilavana avuta ke aiohavoi. Kosealemo Dilava o keu tumute. Ige lata ove tumute.

<sup>18</sup> Lainaho la ebika lobogevelive. Mesoho la moleu huhuai kosea, “Dau vatae vavevemo lulelete.” Isito lulele kateale keu lobo lulele. Katealemo lulele kateale halevai lohoi Dilava vavevemo lulelelahave. <sup>19</sup> Kosealemo vata ko luleleu Dilava nimo momae lulele. Kemo Bukae Hotou loui avoe, “Vatae ataeau abu lulelemo lulelelahamale kebia Dilavana luleleabe malege luleleabe kena uoholisi.” <sup>20</sup> Isime Bukae Hotou tota loui avoe, “Kosiveu hilokage vatae lulelete kebia huhuihuhui keu lobo unaha.” <sup>21-23</sup> Laeau Keliso ataea. Ige Kelisou Dilava ata. Katealemo lainaho la ebika tabagevei vatae lulele ehovage-live. Kosealemo Dilavau onobenobe ke bahata laovenu. Dilavau Abolosi, Bita, isi da no malei laovege no la tedaevema. Au vatamo onobenobe ke bahata malei laovenu. Aike lohoveve, gabie lohoveve, hatihati isi uveve ke bahata malei laovenu. Iale onobenobe ke bahataeau laele.

## 4

### *Iesu Keliso esemuia*

<sup>1</sup> No elegevei koseale huhulahave. “Keau Keliso esemuia. Dilavau subuta au hoto seleve mahogovale ke mai ovege keau nova hoto ke loulmale esemuia.” <sup>2</sup> Noeau Keliso esemuia. Katealemo Dilavau isiviale no nenilahai hotove lougei. <sup>3</sup> Halege la di vaveve kaovai louge di bae ke huhualivebene. Ige ata degomoleau di vaveve kaovai louge keta di bae huhualivebene. Isi di bae di vaveve kateimale huhualivebene. <sup>4</sup> Di uvuu duave. Di huhuige vavevebe toelau daemo uoholinu. Isito Dilavana bae di vaveve



kaovai daemo di vaveve onole loui. <sup>5</sup> Katealemo lainaho mole vaveve kaovai kemo hoto loulive. Gabie Kosiveu lohomale vani kela auna bae atae vaveve kaovai kemo hoto loui. Ataeau vavie vaveve vai mahogovamale kebia auna loui daiai. Isi ataeau abu uvumo huhulahamale ke auna bae loui daiai. Vani kela ata oleuoleu vaveve dua vamale kebiaho Dilavana loui kosea, “La vaveveu duave.”

<sup>6</sup> Di haokuvuia, di hoto ke loumale kemo lana di vaveve Abolosi vaveve kebia nahate vave. Di ke loui isivialeike la Bukae Hotou louale ke huhuai ehovai. Lainaho ata mole ebagevai mole etolevalive. <sup>7</sup> Laeau mole nahate. Oleike la haivege la la ebika tabagevema. Dilava keike onobenobe bahata laovenu. Katealemo lana oleve kateai la ebika tabagevei huhulahai kosea, “No negomoike no ke bahata malelu.”

<sup>8</sup> La lobolahai loui kosea, “No Dilava vaveve dua ke bahata vama. Isi no ke bahata malei vai avuemo kosive holilu.” La kosive holisi vaveve ke bahata vavatege nahi bahataeau kosive holilu. Isito la kateholilu. <sup>9</sup> Noeau Dilava abostolo ataea. Isito di huhuige Dilavau no malevei atae gabila otovenu. Katealemo ataeau huhulahai avoe, “Atae toela abulike ko. Ialemo havege abu haluvisi.” Kateaime atae nimo isi anelue nimo vatehani noevema. <sup>10</sup> No Keliso lovi vamale kemo ataeau no elegevege noeau loboata nahate. Ige la lobolahai loui kosea, “No Keliso hilokai lulelalahalu.” Iale kemo laeau negolahasege noeau negoholilu. Loboata vaveve kateimalemo ataeau no aiogeveito la hoesegevema. <sup>11</sup> Katealemo no aike vani komo vaelahai enulahai tima. Isime ogoe toela vama. Ataeau nohavei no aiogeveito. No uveve ou uoholige no matama igaegae ohanoi

tima. <sup>12</sup> No adatelaike no negolahai lovilahai lovi ima. Ataeau no ivi aiogevema. Isito noeau hoe-segevei abuhotoe dua louma. Ataeau vatehani noevema. Isito no ke ibina vaholima. <sup>13</sup> Ataeau noheho hotoe toela louma. Isito noeau abuhoto savate louma. Vani bahata no katelahage ataeau no kabebigevei huhulahage noeau vatae momolu nahate.

<sup>14</sup> Di laheho ko hisaliai isiviholinu la ko evisi matilahaliho. Laeau di uvue ese nahate. Kateike vage di ko hisaliai isiviai la haivei. <sup>15</sup> Ata moag-amoagaeau lae tiale Keliso hoto loui la haivelu. Isito keau la mamuvu nahate holioholilu. Di vasohuta lae tiale hotoe dua loui la haivege la eviale kemoike dau la mama nahate holinu.

<sup>16</sup> Katealemo di la namigevege evive. Di vamale ke nahate vai di ehovave. <sup>17</sup> Dana bae Timoti hanavoge auna lae tai di hoto loui la haivei. Timoti keu di uvue mo. Keu evievi ata holisi Kosive lovimo negoanu. Iale auna bae lohoniege di Iesu Keliso humaha ehomai ekalesia bahata haivemale ke deiada loui la namigeveve.

<sup>18</sup> Isito laemo ata degomoleau abu ebika tabagevei huhuige di bae lae dei ai loholivebene. <sup>19</sup> Isito Kosivena isiviage dana solekai lae lohoniege bae ataeau abu ebika tabageveale kebia vaveve kaovai hilokai. Vaveveabena vuvuneanu. Mena hoto unahaike abu vama. <sup>20</sup> La la ebika tabagevei loui kosea, “Noeau Dilava adae vuvunemo ua.” Kateaito la hoto unahaike ke louma. Kosealemo la hoto kemo vuvune vavevebeu uoholinu. <sup>21</sup> Katealemo dana lohoniege oleve kateai la haivei. La huhuige di la vaveve toela kemo hoto isute louge kena duave. Emena lana la

vaveve hoesegevege di kemo hoto savate loui la hoesegevege kena duave.

## 5

### *Ekalesia ata moleu vaveve toela baluga vale.*

<sup>1</sup> Ata degomoleau di namihage di hilokage vaveve toela balugau laemo ua. Evievi ata holioholiale keau vaveve toela kateale vaholima. Isito evievi ata la kebiamo ata moleu au mamae keate melamei avuti lahama. <sup>2</sup> Katealemo la osiohoike la ebika tabagevema. Abege vaveve toela kemo la uvulahai malaha keu vaveve toela vale ke iovage au guliguli halei u unahai. <sup>3</sup> Di lahehi uoholinu. Isito di vaveve ke huhuai loui kosea, “Malaha keu vaveve toela vanu.” Di uvatege hoto kateai loui malaha ke iomage au tinu. <sup>4-5</sup> Isito di lahehi uoholige vaveve koseale vave. La bahata nahie Kosive Iesu ke ivimo igaetolahai di huhuale ke vai nahie Kosive Iesu Keliso ke vuvunemo ata ke mai iovage au Setene vuvunemo ui. Ige elike vaveve toela balugau avuemo lohoge au ke elehai au vaveve toela kemo tota hoilahai. Ilive elike Kosiveu lohomale vani kela ukolikoli mai.

<sup>6</sup> Katealemo lainaho la ebia tabagevelive. La hilokage beikini bauda esevehame mai valavamo mamoge auna ke lahoai. Ke nahate vaveveve toela kena la bahata lahoevei la aiogevei. <sup>7</sup> Katealemo vaveve toela vale ata ke iovage au guliguli halei u unahai. Isege laeau vaveve dua vave. Kemoike lana valavae doga beikini bauda mamoholiale ke nahate vave. Iesuu nahie Basova mamoe ke nahate vai nahie vaveve toelaho hatisi ulihanu. <sup>8</sup> Nahie vaveve toela keu beikini bauda nahate. Katealemo nahi subuta vavevete toela ke

bahata halevai huhuihuhue dua vai vaveve dua vai Iesu ehovai.

<sup>9</sup> Di subuta hoto mole hisaliai laheho hanavoale kemo di loui kosea, “Ataeau vaveve toela vai keatehi ladevemale kebiahi igaeto halevave.”

<sup>10</sup> Evievi ata holioholiale kebiaho di hoto ke louholinu. Isito evievi ata lahehoike di ke lounu. Evieviolimale keau keatehi ladevei mole kunaiho isivilahai vavololahai lobe dilava hoe-segevema. Vaveve katealeu vata ko bahatamo ua. Lana oleve keve tige vaveve katealeu ua. <sup>11</sup> Isito di laheho hisaliale keu koseanu. Evievi ata moleu vaveve toela vamale keti lainaho igaetolahalive. Mesoho ata keu loui kosea, “Dau evievi ata.” Isito keu vani bahata keatehi ladevei mole kunaiho isivi balugai lobe dilava hoesegevei hotoe toela loui e toela isi vavoloima. Evievi ata keu kateige keluvuta igaetolahai avuluvuta lovi i halevave.

<sup>12-13</sup> Ekalesiaholiale kebia vaveve di bae kaovai kemo hoto loulivebene. Isito Dilavana vaveveabe kaovai kemo hoto loui. Isito abege la la molete vaveve kaovai kemo hoto louge au ke halei. Keu ke haleholige Bukae Hotou kemo loui avoe, “Vaveve toela vamale ata ke iovage au laemo haliohatui.”

## 6

### *Ekalesiau oleve kateai molemo kotaveve.*

<sup>1</sup> La moleu evievi ata moleti itumuai hotoe toela isute moleho louge hoto ke mai evieviolimale ata kebia nimo loui kota halevave. Isito ekalesia kebiahi uguiavoi hoto ke loui hoesehavoge au uoholisi. <sup>2</sup> Lana hilokaholilu. Gabie Dilava ataeabuna vatae atae vaveve kaovai kemo hoto loui. Laeau Dilava ataea. Lana bae vatae atae

vaveve kaovai kemo hoto louve. Katealemo novae vani komo mole vaveve esehame kaovai louge au uoholisi. <sup>3</sup> Lana hilokaholilu. Gabie nahiabuna anelue vaveve kaovai kemo hoto loui. Katealemo nahi novae uvevemo mole vaveve kaovai hoesehavoge keu toloholinu. <sup>4</sup> La ekalesiaholimale kebia nimo kotae hoto loumale keu tolanu. <sup>5</sup> La matilahage duave. Kosealemo laemo lulelete atana uoholinu. Abege la laemo lulelete ata ebagevage au elike la vaveve toela molemo louale ke kaovage uoholisi. <sup>6</sup> Isito la kateholisito molemo hoto loui kotama. La kateisege evieviholimale ataeau la vaveve kaovai kemo hoto louma.

<sup>7</sup> La molemo hoto loui kotalahamale kemo di hilokage laeau la evievimo negoholilu. Ataeau laemo vaveve toela vage lainaho ke ibina valive. O mesoho ataeau la vavogevege keta duave. Lainaho itumulahai malevei kotalahalive. <sup>8</sup> Isito di evige evievi ata laeau molemo vaveve toela vai mole vavogevei mole malevei kotalahama. <sup>9</sup> La hilokage vaveve toela vamale kateimale keau bae Dilava otogoe matama doge keve talivebene. Lainaho la ebika lobogevelive. La hilokage ataeau vaveve toela vai molehi ladevemale, lobe dilava hoesegevemale, malahaeau keateau mole halevei ata degomolehi ladevemale, isi malahaeau molehi ladevemale kateimale keau bahata Dilava otogoe matama doge keve talivebene. <sup>10</sup> La hilokage vavoloimale ataea, mole kunaiho isivi balugamale ataea, e toela imale ataea, moleho hotoe toela loumale ataea, ata lobogevei moniabe vavoloimale kateimale ata keau Dilava otogoe matama doge keve bae talivebene. <sup>11</sup> La degomoleau subuta katelahama. Isito la Kosive

Iesu Keliso ke ehovage Dilavau ivivemo laemo vaveve toela ulihai la hoesegevege Munanave Tumuu la malevege la nivemo inutolotololahalu.

*A vava keu Dilava Munanae Tumue o.*

<sup>12</sup> La molena loui kosea, “Dilavau humaha bamuoholige dana di isivi vaveve vai.” Keta duave. Isito vaveve degomoleau la hoesegeveholima. Dana loui kosea, “Dilavau humaha bamuoholige dana di isivie vaveve vai.” Isito di isiviholiale vaveve degomoleau di mage di isiviabe valiho.

<sup>13</sup> La molena loui kosea, “Dilavau lovi vale keu ilihoike au ke vanu. Isime lovihoike au uni ke vanu.” La hoto keu seleve. Isito Dilavana isiviage la vava la lovi kena gabiai. Di louale keu koseanu. Dilavau isiviholiale nahie vava kemo nahi vaveve toela vai mole keatehi ladeveliho. Isito keu isiviale nahi nahie vava kemo Kosive hoesehavo. Ige Kosivena nahie vava hoesegevei. <sup>14</sup> Dilavau au vuvunemo nahie Kosive etuvage hovelahanu. Ke nahate nahi haluvige Dilavana au vuvunemo nahi tatuvege nahiabuna hovedevei vavae dogamalei.

<sup>15</sup> La hilokage la vava keu Kelisoele. Katealemo lana teibae vaveve vage la vavana ata ke vavati igaetoai. Kemo lana Keliso vava aiohavove.

<sup>16</sup> Lana hilokaholilu. Ata olena teibae keateti igaetoai lahage ke vavana keate ke vavati igaetoai. Kemo Bukae Hotou loui avoe, “Malaha olena keate moleti lahage kebia vavana igaetoai.”

<sup>17</sup> Iale ata olena Kosiveti igaetoage ke uvuna Kosiveti igaetoai.

<sup>18</sup> Katealemo lainaho mole keatehi ladevege-live. La vaveve toela degomole vage keu bae la vava aiohavolivebene. Isito lana vaveve toela

vai ata moleti lahaliege lana kemo la vava aiohavove. <sup>19</sup> Lana hilokaholilu. La vava keu Dilava Munanae Tumue o. Dilavau au Munanae Tumu laovege keu la uvue uma. La vava keu la vava holioholinu. <sup>20</sup> Isito Dilavau la vavae ibina vai la maleveale kemo la vavevemo Dilava hoesehavove.

## 7

### *Kolivuai mahinuvuaveve deiada*

<sup>1</sup> La subuta daho hisaliai hanavoale kemo dana hoto loui la namigevei. Di huhuige ata moleu mahinaholiale keu duave. <sup>2</sup> Isito ata moagaeau vaveve toela vai molehi ladevemale kemoike di isiviale la bahataeau mahinuvulahai kolivulahave. <sup>3</sup> La oleu mahinai kolianiege molehi igaetoai ladeveve. Lainaho mole halevei lahuvela ladevelive. <sup>4</sup> Kosealemo keate ke vavaike koliaive vava. Ige malaha ke vavaike mahinave vava. Keate kena au vavamo au kolia isivi vai. Ige malaha kena au vavamo au keate isivi vai. <sup>5</sup> Malahaeau keatehi moleho kabebi halevai vani bahata igaetolahai ladevege duave. Isito vani mole lana mole namigevei loui kosea, “Nahi molehi igaetolahai ladeve halevai guligulilahai.” Keta duave. Isito lainaho vani moaga mole halevei lahuvela ugei. Kosealemo vani moaga lana mole halevesege Setenena huhuihuhui toela laheho hanavoge kemo dobuluvive.

<sup>6</sup> Di hoto ke louale keu menakae hoto holioholinu. Isito di isivie hotoike. <sup>7</sup> Kemoike di isiviale ata bahata da nahate vai mahinuvuholisi. Isito di hilokage Dilavau vuvune igaegae ata oveale kemo ata degomoleabuna mahinuvulahasege degomoleau bae mahinuvulahalivebene.

<sup>8</sup> Katealemo mahinuvuholisi kolivuholisi gobuvu holisi umale kebiaho dana hoto mole loui haivei. Evive. Di mahinaholiale ke nahate la mahinuvuholisi kolivuholige duave. <sup>9</sup> Isito lana negoholisi koliaveve huhulahai mahinaveve huhulahaliege keta duave. Hovedevei la isivi vai kolivulahai mahinuvulahave. Isito lana kateholisito vani bahata vavoloe vaveve ke huhulahage keu toelanu. <sup>10</sup> Isito mahinuvulahai kolivulahamale kebiaho dana menakae hoto mole loui haivei. Kou di hoto holioholinu. Isito Kosive hotoike. Keu loui avoe, “Mahinau bae au kolia halelivebene.” <sup>11</sup> Isito auna au kolia haleniege au bae malaha mole melamelivebene. Vani mole auna tota hoilahai au kolia keti igaetoage keta duave. Mahinaho hoto keu kateanu. Ige koliave keta bae au mahina halelivebene.

<sup>12</sup> Dana hoto mole loui ata degomole haivei. Kosiveu hoto ko louholinu. Isito di isivie hotoike di ko louliho. Mesoho malaha moleu evievi ata holisege mahinaveu evievi ata holioholisito au isiviai abu koliati uge koliaveu bae halelivebene. <sup>13</sup> O mesoho keate moleu evievi ata holisege koliaveu evievi ata holioholisito isiviai abu mahinati uge mahinaveu bae ke halelivebene. <sup>14</sup> Kosealemo keate keu au evievimo abu koliati uveve dua vage mesoho Dilavana koliave uvu ekovehage auna hoilahai evievi ata holisi. Ke nahate malaha moleu au evievimo abu mahinati uveve dua vage mesoho Dilavana mahinave uvu ekovehage auna hoilahai evievi ata holisi. Keau katelahage mesoho eseabe keabuna evievi ata holisi. Isito keau kateholige eseabe keau bae mesoho evievi ata holilivebene. <sup>15</sup> Ige evievi-holimale ata moleu isiviai evievi ata halege keta



duave. Lainaho keluige au ulive. Kosealemo Dilavau isiviale atave keau molehi uveve dua unaha vai. <sup>16</sup> Evievi keatea, la hilokaholilu. Vaveve oletemo lana la kolivu hoesegevege ke-abuna evievi ata holisi ukolikoli malei. Evievi malahaea, lata hilokaholilu. Vaveve oletemo lana la mahinuvu hoesegevege abuna evievi ata holisi ukolikoli malei.

*Dilavau a hohavoge a ehomale kemo unela.*

<sup>17</sup> La lovi onole vasege Dilavau la hohavei vuvune igaegae laoveale kemo ui tigeve. Katealeike di dubu igaegae tiale ekalesia haivema. <sup>18</sup> Subuta Dilavau la hohaveholisege la degomoleau Diue vaveve vai la vudie vate bohilu. Isito Dilavau aike la hohavege la ke ehovamale kemo lainaho la subuta vale ke huhulahagelive. O mesoho la degomoleau la vudie vate bohioholige Dilavau la hohavege la ke ehovamale kemo lainaho Diue vaveve vai la vate bohilive. <sup>19</sup> Kosealemo vudie vate bohimale o vudie vate bohioholimale keu Dilava nimo baluga holioholinu. Isito Dilava menakae hoto evisi ehovamale keu baluga. <sup>20</sup> La lovi vade vasege Dilavau la hohaveale kemo uve. <sup>21</sup> La degomoleau heiata lovilahasege Dilavau la hohaveale keta lainaho huhulahagelive. Isito la vamale lovi ke valage vani mole abuna la iovege la lovi ke halevai la isivi unaha vave. <sup>22</sup> Di louale keu koseanu. Dilavau ataeau heiata vatae kosivebiaho lovilahamale kebia hohavege abu ehovamale kemo keau kosive kebia ata holioholisito Dilava ata holilu. Ige abu isivimo loviamale kebia Dilavau hohavege keau Keliso lovi vamale ata holilu. <sup>23</sup> Dilavau ibina baluga vai la malevenu. Katealemo lainaho vatae atae isivi

vai vaveve toela vagelive. <sup>24</sup> Di haokuvuia, la lovi onole vasege Dilavau la hohaveale kemo uve. Ige Dilavana lahehi ui la lovi ke hoesehavo.

*Kolivuai mahinuvuholiveve deiada*

<sup>25</sup> Dana hoto mole loui mahinuvuai kolivuholimale kebia haivei. Kosiveu menakae hoto loui di namihaholinu. Isito keu au uvu mai daoi lulele daoale kemo dana hoto mole loui la haivei.

<sup>26</sup> Di huhuige vatetumu balugau aike ekalesiamo lohoale kemo lainaho mahinuvulahalive.

<sup>27</sup> Lana aike mahinuvulahalu. Keta duave. Lainaho ke halevalive. Mena lana mahinuvuholilu. Keta duave. Lainaho mahinuvuveve huhulahalive. <sup>28</sup> Isito lana mahinuvulahage keta duave. Keu vaveve toela holioholinu. Ige mahohoeau kolivulahage keta duave. Keu vaveve toela holioholinu. Isito lana kolivulahai mahinuvulahaliege vatae onobenobe huhu balugaito Kosive huhu eseveave. Katealeho di isiviholinu.

<sup>29</sup> Di haokuvuia, di hilokage vaniu vuguvuguanu. Katealemo di isiviale mahinuvulahamale keau mahinuvuholimale kebia nahate vai Dilava lovimo negoagei. <sup>30</sup> Lainaho vanie duamo vanie toelamo Dilava momahavo lovlive vaholilive. Isi lainaho kunai vade voilahaveve huhulahai kemo lovlive vaholilive. <sup>31</sup> Lainaho vatae onobenobe huhulahai la uvu bahata kemo mavolive. Kosealemo vatae onobenobeu aike umale keabuna bahata uoholisi.

<sup>32</sup> Katealemo di isiviale vatae onobenobe ke huhu moaga halevave. Mahinuvuholimale keau isiviai Kosive lovimo uvu igaeai lovlive vai Kosive vahaeho vai. <sup>33</sup> Isito mahinuvulahamale keau vatae onobenobe huhulahai isiviale abu mahinuvue vahaeho vai. <sup>34</sup> Ige kemoike mahinuvulahamale keau uvu abuilahalu. Keau Kosive lovi

huhulahai vatae onobenobe keta huhulahama. Isege kolivuholimale keau kateholisito abu vava abu uvu bahata Kosive lovimo mavoi ke unaha huhulahama. Isito kolivulahamale keau vatae onobenobe huhulahai isiviale abu kolivue vahaeho avi.

<sup>35</sup> Keatealemo di hoto ko loui isiviai la tedaevei. Di isiviholinu menaka isute laheho mamoliho. Isito di isiviale la vaveve dua vai la uvu bahata Kosive lovimo mavoi kemo negolahave.

<sup>36</sup> Mo moleu mesoho ma moleti moleho isivilahaito mole holoeveholilu. Kosealemo abu isiviale Kosive lovi vai. Iniege mo keu ma ke elehage keu belika holima. Isi kateai isiviale ma ke melamei. Kateige au ma ke melamege keta duave. Kemo vavevebe toelau uoholinu. <sup>37</sup> Isito mesoho mo keu au isivimo loui kosea, “Di bae ma ke melamelivebene: Dana Kosive lovi vai.” Kateige keta duave. Au ma ke melame halei. <sup>38</sup> Di louale keu koseanu. Mo keu au ma melamege keu duave. Isi mesoho au ma melameholige keu duave seleve.

<sup>39</sup> Kolivulahamale keate keau bae abu kolivu halevelivebene. Isito kolivuiabeau haluvige keabuna malaha mole melavei. Humaha kateale di bae bamulivebene. Isito di isiviale keau evievi ata unaha holoevei. <sup>40</sup> Di huhuige gobuvu keabuna kolivuholisito abuhavela uge keu duave. Keabuna kemo vahaeholahai. Keu di huhuihuhuilike. Isito di huhuige Kosivelike au Munanae Tumumo huhuihuhui ke mai daonu.

## 8

### *Lovi malei lobe dilava hoesehavomale deiada*

<sup>1</sup> Ataeau lovi malei lobe dilava hoesehavomale ke ivevemo dana aike hoto mole loui. Di

hilokage nahi bahata lulelelahalu. Isito nahi-abuna nahie lulelemo nahie ebika tabagevege keu toelanu. Isito nahiabuna nahie lulelemo moleho isivilahai mole tedaevege keu duave. <sup>2</sup> Ata oleu huhuai loui kosea, “Di vaveve bahatamo luleleanu.” Keu kateige nahi hilokage keu luleleholinu. <sup>3</sup> Isito ata oleu au uvu mai Dilava omisi avuho isiviage auna au lulele omisi.

<sup>4</sup> Di loboe dilavae lovi iveve kemo hoto louge evive. Ataeau lovi malei loboe dilava hoesehavomale kemo nahi hilokage loboe dilava hoesehavomale ke ihuu uoholinu. Kosealemo nahi hilokage Dilava igaeu ua. <sup>5</sup> Ata degomoleau loui avoe, “Otogoe dilava moagaeau ua. Ige vatae dilava moagaeau ua.” <sup>6</sup> Isito nahi hilokage dilava moagaeau uoholilu. Nahie Mama Dilava ke igaeu ua. Keike onobenobe bahata vaevenu. Keike nahie uveve nahiovenu. Isi nahi hilokage Iesu Keliso keu nahie Kosive igae. Dilavau louge keike onobenobe bahata vaevei uveve nahiovenu.

<sup>7</sup> Isito evievi ata bahata keau kemo luleleholilu. Kebia degomoleau subuta loboe dilava hoesegevema. Kemoike abu nova huhulahai avoe, “Abu lovi ke malei loboe dilava hoesegevemale ke no bae ilivebene. No lovi ke ige keu noemo vaveve toela.” Abu kateale huhulahai lovi ke ioholima. <sup>8</sup> Isito nahi lovi imale mesoho ioholimale keu Dilava nimo bae nahie hoesegevelivebene. Lovi iveve keu Dilava nimo baluga holioholinu.

<sup>9</sup> Keu kateanu. Isito kemo la ebika nenigeveve. Lana hoto ke evisi loui kosea, “No loboe dilavae lovi ke ige duave.” Kateige evievimo negoholimale keabuna la lovi iale ke elehai abuta lovi ke isi huhulahai kosea, “No vaveve toela valu.” <sup>10</sup> Di

louale kemo mesoho la moleu evieviveu vaveve kateimalemo negoholialeu elehasege evievi ata moleu lovi ke hilokai ige ata kena gabie avuta lovi ke isi. <sup>11</sup> La lovi ke iale kemo Kelisou la haoka evieviveu negoholiale keho hatiale kena la vaveve kemo au ebika aiohavoi. <sup>12</sup> Laeau vaveve toela kateale vai kebia aiogevemale kemo uvuiabeu toelanu. La vaveve kateimale vama- malemo Kelisotaike la ke aiohavoma. <sup>13</sup> Di lovi vade ige di haokau ke elehai isi kemo dobage keu toelanu. Katealemo di bae loboe dilavae lovi ke ilivebene. Di isiviholinu di haokau di vaveve elehai kemo dovaliho.

## 9

### *Abostoloeau ono vade vaveve deiada*

<sup>1</sup> La huhuige dana di isivi unaha vai di haokuvu aiogevai. Ba, Dilavau au abostolo lovi daoge di nahie Kosive Iesu ke elehanu. Di Kosive lovi vamale kemo laeau evievi ata holilu. <sup>2</sup> Ata degomoleau huhuige dau abostolo ata holioholinu. Isito laeau hilokage dau abostolo ata. La evievi ata holiiale kemo la hilokage dau Kosive abostolo ata seleve.

<sup>3</sup> Isito di abostolo holisi Kosive lovi vasege ata degomoleau di abostolo kemo loui avoe, “Ata keu abostolo seleve holioholinu. Keu loboai atae lovi isi moniabe malema.” Kateige dana hoto koseale loui hotoeabe ke hamai. <sup>4</sup> Di Kosive lovi vasege abu lovi daovamale keu duave. <sup>5</sup> Ige abostolo degomole, Kosive hohuvuia isi Bita keau abu mahinuvuhi olahai tai ata haivemale ke nahate di data vage keu duave. <sup>6</sup> Abostolo degomole kebia la tetaevei lovi ovema. Isito la huhuige noe- abuna Banabasiti no unaha no adatela no lovite

vai. <sup>7</sup> Tuvai ataeau gamanie lovi vage gamani kena ibinaeabe vai moni ovegei. Ige ata moleu bulue lovi vamale kena au bulumo lovi igei. Ige bolomakau nalievemale kena bolomakau amue e malei loviho igei. Ke nahate no Kosive hoto loui ata haivesege abu no tedaevei lovi noevege keu duave.

<sup>8</sup> Di louale keu atae vaveve unaha holioholinu. Isito Dilava menaka keta kateanu. <sup>9</sup> Nahi Mosese menaka hoto dodavege keu loui avoe, “Bolo-makau bulumo loviasege lainaho aive bamui umuvalive. Keu bulu kemo loviai lovi ige keu duave.” La huhuige Dilavau bolomakau vaveve hotonike au ke lounu. <sup>10</sup> Ba, keu nohehoike au ke lounu. La hilokage vata hamale isi lovi lovomale keau abu lovi vai isiviale bulu kemo lovi igei. Iale no Banabasiti ata kebia nahate. <sup>11</sup> Noeau lae tiale Dilava hotoe dua loui la haivelu. La huhuige no la haivesege la no tedaevei lovi noevege kena duave. <sup>12</sup> Abostolo degomoleau subuta la haivesege la lovi ovemale ke nahate la huhuige noeau la haivesege la lovi noevege kena duave. Di huhuige keu duave. Isito noeau loviho la imigeveholisito no adataike no lovilahaima lovi ima. Kosealemo no isiviholiale la huhulahai kosea, “Keau Keliso hoto loui no haivemale ibinahoike abu loviho no imigevema.” <sup>13</sup> La hilokage ataeau Diue dubu baluga kemo lovilahamale keabuna dubu ke lovi malei igei. Ataeau lovi malei lohoge abuna Dilava hoesehavoito lovi ke vaki mole malei igei. <sup>14</sup> Ke nahate Kosiveu isiviale oleuoleu hotove dua loui ata haivemale keabuna ata kebiamo abu iveve lovi malegei.

<sup>15</sup> Isito di katealiho isiviholinu. Di laemo kunai

maleliho hoto ko hisaliholinu. Di Dilava hoto loui ata haivenata vaeo hatige keta duave. Isito di ke ibinaho laemo kunai malelivebene. Dana laemo kunai malege di hoto ko louale kena dobai.

<sup>16</sup> Di Dilava hoto loumale kemo di ebika ebage-malivebene. Kosealemo Kosiveike di hanavoge di hoto ke louma. Di Dilava hoto loui ata haiveholige da nohoma. <sup>17</sup> Dana di isivimo lovi ke vaniege huhuai kosea, “Dana lovi ke ibinae dua mai.” Isito Dilavau lovi ke daoale kemo dana isivive vai lovi unahai. <sup>18</sup> Katealemo dana ibina onole mai. Di hotoe dua loui ata haivesege abu evimale keu di ibinaike. Di isiviholinu ata haivemale ke ibinaho kunai maleliho.

<sup>19</sup> Di ataemo di ibinaho lovi ke vaholima. Dau ata mole esemu holioholinu. Isito di ata bahatae esemu nahate vai isiviai kemo Kosiveho ata moaga malevei. <sup>20</sup> Dana Diue oe tiniege Diue vaveve nahate vai. Katealive kebiamo Kosiveho ata malevei. Dau Mosese menakae hoto ke ehomaholima. Isito dana oleve keve tiniege mesoho Diue ata haiveniege kebia vaveve nahate valive elike kemo ata malevei. <sup>21</sup> Dana Diue ata holioholiale kebia oe tiniege kebia vaveve nahate vai. Ata keau Mosese menakae hoto ke ehovai tiholima. Ige data menaka ke ehomaholisi Diue ata holioholiale kebia vaveve nahate valive kemo kebia malevei. Di vaveve kemo di Dilava menaka ke kabebihavoholinu. Isito di Iesu Keliso menakae valamo ui ke ehomama. <sup>22</sup> Dana evievimo negoholimale kebiae tiniege hoto tolote loui namigevelivebene. Isito dana di ebika etolemai kebia hoesegevelive kemo kebia negotievei. Katealemo dana ata bahatae vaveve nahate vai elike ata degomole malevei ukolikoli humahamo otovei.

<sup>23</sup> Di vaveve kateale vamale keu koseanu. Di hotoe dua loui ata haivemale kemo Dilavana kebia hoesegevei data hoesehavoi. <sup>24</sup> La hilokage ataeau gilul molemo bibuluviale kemo ata moagae abuna bibuluvisi. Isito kebiamo mesoho ata igaena ibina mai. Ke nahate la nova Dilava hotomo negolahai tige auna ibinae dua laovei. <sup>25</sup> Gilulahamale ata keabuna gilue tovetove vai hilokaito bae gilulahai. Abuna negolahai gilulahaliege ibina mai. Isito ibina kateale male keu bae ui egealivebene. Isito nahi Dilava hotomo negolahage au ibina nahioveveve keu bae uholilivebene. <sup>26</sup> Katealemo di Dilava humahamo inuta bibuai tima. Abu mole baisigeveho tovetove vai negolahale ke nahate di vai loboholisito Dilava lovima negoanu. <sup>27</sup> Dana di vaveve tovetovehavoholisi di vaveve hoesehavoholisi Dilava lovi kemo negoholige Dilavana di lovoho ata mole mage auna hotove loui ata haivei.

## 10

*Abu subuta vaveve toela vale keu nahie haivenu.*

<sup>1</sup> Di haokuvuia, di isiviale nahie buluveau subuta Mosese ehovamale kebia vaveve huhulahave. Vani kemo Dilavau goemo abuhi ua. Isege abu e baluga ivi Tahote ke houi tilu. <sup>2</sup> Goe keu ata kebia bamuevesege keau Moseseluvuta e kemo babatisoale ke nahate vai e ke houi vaki moleve tilu. <sup>3</sup> Ige Dilavau otogoe lovi hanavoge abu bahata ke ilu. <sup>4</sup> Isime louge e duau munemo lohoge abu bahata ke ilu. Mune keike Iesu Keliso. Keu vani bahata kebiahi timale kemoike abu lovi isi e ima. <sup>5</sup> Keau katelahaito hoto evie dua



vaholige Dilavau kemo kebia vahaeho vaholisi hanavege abu tomagie tiale igaegaeai haluvilu.

<sup>6</sup> Ata keau subuta vaveve toela vale keu nova nahie haivege nahi vaveveabe toela ke nahate va halevai. <sup>7</sup> Subuta ata kebiau lobo dilava hoesehavomale kebia nahate nahi va halevai.

Bukae Hotou louale ata keau uguiavoi lovi isi e isi hovevevei lobo dilava hoesehavoi havulahama.

<sup>8</sup> Ata keau vaveve toela vai molehi ladevemale kebia nahate nahi va halevai. Keau vaveve toela ke vamale kemo ata moagamoaga tuenti tili taoseni (23,000) keau vani igaemo haluvilu.

<sup>9</sup> Ata keau Kosive vuvune vaveve kaovamale kebia nahate nahi va halevai. Keau kateige Dilavau ute hanavege kebia uagevege ata moagaeau haluvilu. <sup>10</sup> Lainaho ata keau Dilavaho itumue hoto loumale kebia nahate valive. Keau kateige Dilavau anelu hanavoge kebia havege abu haluvilu.

<sup>11</sup> Ata keau vaveve toela vamale ke hoto Moseu Bukamo hisaliai nahie haivei isiviale nahi kebia nahate va halevai. Kosealemo nahiau vanie gabila ua.

<sup>12</sup> Mesoho la degomoleau huhulahai loui kosea, “No negolahalu. No bae vaveve toela kateale valivebene.” Isito la ebika nenigeveve. Onoilage la moleu avuemo dobama. <sup>13</sup> Vaveve toela bahatau laemo lohomale keau ata bahatamo lohoma. Isito Dilavau la negotieveve louale kemo au bae vaveve toela la avuemo dobuluviveve ke bae laovelivebene. Vaveve toelau laemo lohosege auna nego laovei laheho humahae dua alavoge lana vaveve toela ke evihai tigeve.

<sup>14</sup> Di uvue haokuvuia, lainaho lobo dilava hoesehavogelive. <sup>15</sup> Laeau lulelete ataea. Katealemo

di louale ko elehage au laemo duaveage ehovave. <sup>16</sup> Nahiau aletu kabu mai ke hoesehavoitu huluhahai kosea, “Kelisou noheho hatai no hoesegevenu.” Nahi katelahai ke ige lana huhuige nahi Keliso taho kemo igaetolahalu. Isime nahiau valava vakoai ke ige lana huhuige nahiau valava kemo Kelisoluvuta igaetolahalu. <sup>17</sup> Seleveta nahi bahata valava ke igae imale kemo nahiau Iesuluvuta vava igae.

<sup>18</sup> Iselala ata kebiae vaveve keu ke nahate. Abu mesia malei vaki mole mahoi Dilava hoesehavoitu vaki mole ima. Katealemo abu huhulahai loui avoe, “Noeau Dilavaluvuta igaetolahalu.” <sup>19</sup> Di louale keu koseanu. Ata degomoleau lovi malei loboe dilava hoesehavomale ke ihuu uoholinu. <sup>20</sup> Kosealemo keau lovi malei mahoi Dilava seleve hoesehavoholima. Isito lovi malei loboe dilava hoesegevemale keau kemo munanae toelaike abu hoesegevema. Katealemo di isiviholiale la munanae toela hoesegevemale kebiahi igaetolahaliho. <sup>21</sup> La vani mole Kosive kabumu aletu isi vani mole ataeau loboe dilavata munanaeabe toelata hoesegevemale kebia kabumu e ige keu anekianu. Isi la vani mole Kosive batabatamo aletu isi vani mole munanae toela batabatamo lovi ige keu anekianu. <sup>22</sup> La vaveve kateale vage Kosivena itumuai. La huhuige la vaveve katealena Kosive nego evihai. Ba, keu anekianu.

<sup>23</sup> Isito la degomoleau loui kosea, “Noeabuna no isivi unaha vai.” La kateai louitu di kemo loui kosea, “Vaveve bahata keau duave seleve holioholilu.” La tota loui kosea, “Noeabuna no isivi unaha vai.” Isito mesoho vaveve keu bae la tedevelivebene. <sup>24</sup> Atabeu bae au ebika unaha

huhualivebene. Isito ata degomole huhuevei kebia tediaeve dua vai.

<sup>25</sup> Mesia malei maketiamale kebiamo mesiae ibina vai ke ige duave. Lainaho mesia ke huhuai deiadaveho belagevei loui kosea, “Mesia kona lobe dilava hoesegevemale kevenike au lohonu. Emena.” <sup>26</sup> Kosealemo Bukae Hotou loui avoe, “Vatae uale onobenobe bahata keau Kosive onobenobe.”

<sup>27</sup> Mesoho evieviholimale atau laheho louge la ke oe deiai tige keu lovi vadeu hamai laovege ke ive. Lainaho lovi ke huhuai deiadaveho belahalive. <sup>28</sup> Isito mesoho la moleu loui kosea, “Lobe dilava hoesehavoale loviliko.” Kateige lainaho lovi ke igelive. Kosealemo la ke ige la degomole abuna ke elehai kemo abu ebika aigevei. <sup>29</sup> La degomoleau hilokage lovi ke iale keu toela holioholinu. Isito la degomoleau ke hilokaholilu. Katealemo lainaho lovi ke igelive.

Mesoho la degomoleau di hoto kemo loui kosea, “Dilavau onobenobe bahata vale kemo noeabuna lovi bahata isi. Vadealemoike noeabuna ata degomole huhuihuhui kemo lovi i halevai. <sup>30</sup> Noeabuna lovi kemo Dilava hoesehavo ke ige keta duave. Isito vadealemoike ata degomoleau noheho loui kosea, ‘La lovi ke iale keu toelanu.’ ”

<sup>31</sup> Isito di laheho louge evive. La lovi isi e isi vaveve onole vamale kemo Dilava ivi ebagevai hoesehavove. Ige ataabuna la vaveve elehai kemo Dilava hoesehavo. <sup>32</sup> Lana vaveve dua kateale vage Diue ata mesoho evieviholimale ata mesoho Dilava ekalesia ata keabuna la vaveve elehai kemo dobuluvilivebene. <sup>33</sup> Di vale ke nahate vave. Dau di vaveve duamo di ebika

ebagemaholinu. Isito dana ata bahata huhuevei vaveve dua vai malevei ukolikolie humahamo otovege abuna tigei.

## 11

### *Keateau dubumo vaveve*

<sup>1</sup> Di Iesu Keliso vaveve vai ehomamale ke nahate lata vai di ehovave. <sup>2</sup> Di haokuvuia, di la vahaeho vanu. Kosealemo di hoto bahata loui la haivemale ke la huhulahai vama. <sup>3</sup> Isito di hoto ko igae louge kemo lulelelahave. Keliso kinaike Dilava. Keu ke valamo ui isivive vama. Iale ke nahate malaha kebia kinaike Keliso. Ige keate kebia kinaike malahaea. <sup>4</sup> Katealemo malaha oleu guliguliho mesoho Dilava hoto louliho dubue uvue tai au saneka mai kina aneale keu kemo Keliso aiohavonu. <sup>5</sup> Isito keate oleu guliguliho mesoho Dilava hoto louliho dubue uvue tai au kina bamuholiale keu au kolia aiohavonu. Evievi keateau abu kina bamuholisi dubue timale keau teibae keateau abu kina bohige kouale ke nahate. <sup>6</sup> Evievi keate oleuoleu abu kina bamuholimale keau abu kina bohige au kouage duave. Ige abu ke elehai matilahaliege abu kina bamui guliguliho tai. <sup>7</sup> Isito malaha keabuna dubue tiliege abu kina bamulivebene. Kosealemo Dilavau malaha vale keabuna valavemo ui hoesehavo. Isito keate keabuna abu kina bamui. Kosealemo keabuna malahae valamo ui abuta Dilava hoesehavo. <sup>8</sup> Dilavau keatemo malaha vaholinu. Isito keu malahamo keate vanu. <sup>9</sup> Keu keateho malaha vaholinu. Isito malahaho keate vanu. <sup>10</sup> Katealemo keate keabuna abu kina bamuge ataeabuna hilokage keau abu kolivu vuvune valamo umalea. Keau katelahage aneluiabuna ke elehai vahaeholahai. <sup>11</sup> Kosiveu

isiviholiale keateau malaha halevei abuhuvela uliho. Isi malahaeau keate halevei abuhuvela uliho. Isito keabuna molehi igaetolahai ui. <sup>12</sup> Kosealemo onobenobe bahata keau Dilavamo loholu. Dilavau malahamo keate vanu. Ige keatemo malahaeau ua.

<sup>13</sup> La huhuige keate keabuna dubue uvue Dilava hoesehavoï guliguliho abu kina bamuholige kena duave. Ba, keu toelanu. <sup>14</sup> La hilokage malahaeau abu kina halevage egeige abuna kemo matilahai. <sup>15</sup> Isito keateau abu kina halevage egeige duave. Kosealemo Dilavaike kina egete ovege au kinaeabe bamunu. <sup>16</sup> Mesoho atabena isiviai di hoto bokoige dana hoto koseale loui. No hoto ke igae loui ata haivema. Iale Dilava ekalesia keau vaveve ke igae vama.

### *Aleto iveve*

<sup>17</sup> Dana aike hoto mole loui bae kemo la hoe-segevelivebene. Kosealemo ekalesiau mole bevuevei mole hoesegevege duave. Isito laeau kateholisito mole aiogevema. <sup>18</sup> La vaveve toela mole vale di evige keu koseanu. La igaetoai mole bevuevei hoto evisito hoto kemo moleho loui mole tasalievema. Di hoto ke evisi huhuige mesoho seleve. <sup>19</sup> La moleho loui mole tasalieveale kemo dana hilokage la oleteau vaveve seleve vama. Isege la oleteau vaveve lobo vama. <sup>20</sup> Katealemo la mole bevuevei igaetolahai Kosiveu louale ke nahate aleto ioholima. <sup>21</sup> Isito la degomoleau lovi baluga e baluga malei lohoale dubue ima. Isege la degomoleau adala lohoalelua lovi ioholisi e ioholisi vaeta uma. La kemo lovi isi e isi mole oveholige keu toelanu. <sup>22</sup> La vadeuhoike

la oe lovi ioholisi e ioholima. La kunaiholi-  
male kebia nimo lovi baluga imale kemo Dilava  
ekalesia aiogevema. Katealemo la huhuige dana  
la hoesegevei laheho hotoe dua loui. Ba, di  
kemo bae la hoesegevelivebene. <sup>23-24</sup> Di subuta  
vaveve kateale loui la haiveholinu. Isito Kosive  
vaveve ke di loui la haivenu. Diudasiu nahie  
Kosive Iesuho haiale vavi kela Iesu valava mai  
hoesehavoi vakoai loui avoe, “Di misilike ko di  
laovema. Ke isi di huhulahave.” <sup>25</sup> Ige ese-  
muiabeau ke ige uholige au kabu mai namigevei  
loui avoe, “E kou di tahoike ko. Iale di tahona  
lotige Dilavana di taho kemo laheho menakae  
doga vai. La ko iliege di hatiale ke huhulahave.”  
<sup>26</sup> Iesu hoto keu kateanu. Iale la valava ke isi e  
ke imale ke ataeabuna elehai Kosiveu hatiale ke  
hilokai. Ilage au lohoi.

<sup>27</sup> Katealemo ata oleu Iesu tahota vavata  
huhuige keu avuemo baluga holioholinu. Isi  
kateai au vaveve toela hovadamo aletu iniege  
tahoveta vavavetai ke au ke aiohavonu. <sup>28</sup> Ialemo  
di isiviale la vasohuta la vaveve toela huhula-  
hai louito bae valavata e keta isi. <sup>29</sup> Valava  
keu Kosive vavae misi nahate. Ige kabu ke  
eu tahove nahate. Katealemo lana la toelata  
ke ige Dilavana la vaveve ke kaovai ibinave  
laovei. <sup>30</sup> Katealemoike la moagaeau vavahaniai  
negoholisi haluvima. <sup>31</sup> Isito nahiabuna vaso-  
huta nahie vaveve toela huhulahai louito ke ige  
Dilavau bae nahi aiogevlivebene. <sup>32</sup> Nahi nahie  
vaveve toela kaovai louholige Dilavana nahie  
vaveve kaovai vatehani nahiovege nahiabuna  
kemo lulelelahai. Katealemo nahi bae vatae atahi  
ibinae toela malivebene.

<sup>33</sup> Katealemo di haokuvuia, la Kosive aletu iliho

valiege lainaho mole malevei iahatui ke ilive. Isito mole bevuevei igaetolahaito bae ke ive. <sup>34</sup> La oe lovi ioholisito lohoi aletu iale keu toelanu. Isito la oe lovi isito bae lohoi igaetolahai aletu iale keu duave. Lana katelahage Dilavau bae vatehani laovelivebene. Isito dana bae gabie lae lohoi kemo hoto mole loui la haivei.

## 12

### *Munana Tumue vuvune vaveve*

<sup>1</sup> Di haokuvuia, Dilava Munanae Tumuu vuvune vaveve nahioveale kemo di hoto loui la haivege lulelelahave. <sup>2</sup> La hilokage la subuta evievi ata holioholilu. Isi la lobo dilava hotoholimale kebia hoesegevei negolahai ehovei tima. <sup>3</sup> Katealemo di la namigevei. Atabeu bae Dilava Munana Tumue vuvunemo Iesuho hotoe toela loulivebene. Isito Munanae Tumuu avuemo uale kemo auna loui kosea, “Iesu keu di Kosive.”

<sup>4</sup> Vuvune vaveve nimoleteau ua. Isito Dilava Munanae Tumu ke igaeu vuvune vaveve nahiovema. <sup>5</sup> Kosive lovi vaveve kemo humaha moagau ua. Isito nahi lovive ke vai Kosive igaeike ke hoesehavoma. <sup>6</sup> Kosive lovi vaveve kebiamu humaha moagau ua. Isito Dilava ke igaeu au vuvune nahiovege nahi lovive vama. <sup>7</sup> Ige Dilava Munanae Tumuike vuvune vaveve igaegaeai nahiovei isiviale nahi kemo mole negotievei. <sup>8</sup> Munanae Tumuu nahi degomole vuvunetievege abu kemo lulele hoto loui nahi haivema. Munanae Tumu ke igaeu nahi degomole vuvunetievege abu kemo Dilava hoto kaovai nahie haivema. <sup>9</sup> Munanae Tumu ke igaeu nahi degomole vuvunetievege

abu kemo abu evievimo negolahama. Keu nahi degomole vuvunetievege abu vavahanite degomole hoesegevema. <sup>10</sup> Munanae Tumu ke igaeu degomole vuvunetievege abu vikoe vaveve vama. Ige degomoleau Dilava hoto loui ata haivema. Ige degomoleau Munanae Tumu ke vuvunemo hilokage vaveve oleteu seleve. Isege vaveve oleteu lobo. Munanae Tumu keu nahi degomole vuvunetievege abu hoto nimoletemo hoto louma. Ige nahi degomoleau hoto ke evisi Munanae Tumu ke vuvunemo hoto ke ekovehai ihuve louma. <sup>11</sup> Iale Munanae Tumu ke igaeu au isivimo vuvune vaveve kateale nahiovege nahi ke vama.

*Ada, velo isi vava degomole deiada*

<sup>12</sup> Nahie vavamo velou uge adau uge kinau ua. Isi keau bahata vava igaemo dalu. Ke nahate evievi ata nahiau moaga. Isito nahiau Kelisomo igae. <sup>13</sup> Mesoho nahi degomoleau Diue ata. Isege degomoleau Diue ata holioholilu. Isi mesoho degomoleau heiata lovilahamale ataea. Isege nahi degomoleau nahie isivimo loviamale ataea. Isito nahi bahata Munanae Tumu ke igaemo babatisoale kemo vava igae holilu. Ige Munanae Tumu ke igaeu nahie uvumo ua.

<sup>14</sup> Nahie vava kemo ada unahau uoholioholinu. Isito velou uge kinau uge nahie vavae onobenobe bahataeau ua. <sup>15</sup> Mesoho velona loui kosea, “Dau ada holioholisito dau velo unaha. Kemoike di isiviholinu vavae lovi valiho.” Velou hoto kateai louale kemo au bae vavae lovi ke kabebihavoi au lovo halelivebene. <sup>16</sup> O mesoho golemana loui kosea, “Dau ni holioholisito dau golema unaha.



Kemoike di isiviholinu vavae lovi valiho.” Golemau hoto kateai louale kemo au bae vavae lovi ke kabebihavoi au lovo halelivebene. <sup>17</sup> Mesoho la vava bahata kena ni unaha holige lana oleve kateai hoto evisi. O mesoho la vava bahata kena golema unaha holige lana oleve kateai hagota sohota evisi. Keu anekianu. <sup>18</sup> Isito Dilavau ada velo kina vavae onobenobe bahata au isivimo vavamo vai otoveni. <sup>19</sup> Mesoho Dilavana nahie vavamo golema unaha vage la huhuige nahie vavana oleve kateai. <sup>20</sup> Au kateholisito nahie vavamo ada velo golema kateale vai otovege keau bahata mole isivi vama.

<sup>21</sup> Katealemo niu bae ada iomalivebene. Ige kinau bae velo iomalivebene. <sup>22</sup> Kosealemo vavae onobenobe moleu nahie nimo baluga holioholinu. Isito vavae onobenobe keu uoholige nahiabuna osioi. <sup>23</sup> Katealemo nahie vava degomoleau balugaholimale kebia nahiabuna hoesegeve dua vai. Isime ogota atae nimo bamuevei. <sup>24</sup> Nahie vava degomoleau balugamale kebia nahi hoesegevelivebene. Keabuna abu ahuvela ue dua vai. Isito nahie vava degomoleau baluga holioholimale kebia Dilavau hoesegevei otovege keabuna kemo ue dua vai. <sup>25</sup> Katealemo nahie vavae onobenobe keau bae mole tasalivelivebene. Isito keabuna molehi igaetolahai mole hoesegevei. <sup>26</sup> Mesoho la vava molena tumuige la vava bahata keabuna tumulahai. Isito la vava moleu dua vage la vava bahata keabuna kemo dua vai.

<sup>27</sup> Di vavae hoto louale keu koseanu. La bahataeau Keliso vava. Katealemoike la igaegae lovide vama. <sup>28</sup> Dilavau au lovi igaegae ekalesia ovenu. Keu vasohuta abostolo otoveni. Kebia

valamo beloveta otoveni. Kebia valamo Dilava hoto loui ata haivemale otoveni. Kebia valamo vikoe vaveve vamale otoveni. Kebia valamo vavahanite hoesegevemale otoveni. Kebia valamo mole hoesegevei tedaevemale otoveni. Kebia valamo ekalesia bahata igaetoevei nibievementale otoveni. Kebia valamo hoto nimoletemo hoto loumale otoveni.<sup>29</sup> Dilavau au lovi igaegae ekalesia ovege keau bahata abostolo holioholilu. Keau bahata beloveta holioholilu. Keau bahata hoto loui ata haivemale ata holioholilu. Keau bahata vikoe vaveve vamale ata holioholilu.<sup>30</sup> Keau bahata vavahanite hoesegevemale ata holioholilu. Keau bahata hoto nimoletemo hoto loumale ata holioholilu. Keau bahata hoto nimoletemo hoto loumale kebia hoto ekovehai loumale ata holioholilu.<sup>31</sup> Katealemo Dilavau au vuvune vaveve dua laoveale ke huhulahai kemo negolahave. Isito di aike humaha mole dua loui la haivege ko huhulahave.

## 13

### *Mole hoesegevei isivi mole oveveve*

<sup>1</sup> Moleho isivilahai mole tedaevemale keu baluga. Dana ata degomole hotomo hoto loui mesoho anelue hoto ketamo Dilava hoto loui lulelaito kemo ataho isiviholisi kebia tedaevholige di hoto keu bae ihualivebene. <sup>2</sup> Dana gabie vaveve loui kemo lulelai Dilavau au vaveve mahogovale ke ihu loui ata haivei di evievimo negoai tana moleho louge au halei lotai moleve lamige keu duave. Isito dana kateaito ataho isiviholisi kebia tedaevholige di vaveve kemo ihuveu uoholinu. <sup>3</sup> Dana di kunai bahata malei kunaiholimale kebia oveale keu vaveve dua. O

mesoho di Dilava hoto loui ata haivesege abu di mai mahoge di hatige keta duave. Isito dana kateaito ataho isiviholisi kebia tedaevholige di vaveve keu bae ihualivebene.

<sup>4</sup> Ataho isivilahai kebia tedaevemale vaveve keu koseanu. Nahiabuna solekai itumuholisito mole hoesegevei mole isivi vagei. Vaveve kemo nahi bae mole maina mai isi nahie ebika tabagevelivebene. <sup>5</sup> Moleho isivilahai mole tedaevemale kemo nahi bae nahie isivimo mole aiogevei moleho itumualivebene. Vaveve kemo ata moleu nahi aiogevege nahi bae ke ibina vai aiohavolivebene. <sup>6</sup> Moleho isivilahai mole tedaevemale kemo nahi bae vaveve toelae vahaeho valivebene. Isito nahiabuna hoto seleve vahaeho vai. <sup>7</sup> Nahi moleho isivilahai mole tedaevemale kemo abu nahie aiogevege nahi ke huhu halevaito nahie evievimo negolahai ono vadeu gabie lohoveve ke huhulahai tigei.

<sup>8</sup> Gabie vaveve hoto loui ata haivemale kena bae gabiai. Ige abu hoto nimoletemo hoto loulmale kena bae gabiai. Nahi vatae vavevemo lulelelahamale kena bae gabiai. Isito nahi moleho isivilahai mole tedaevemale keu bae uoholilivebene. <sup>9</sup> Nahie lulele keu aike esevehame. Ige nahi nova gabie vaveve ke loui hilokamale keta eseve. <sup>10</sup> Isito vanie gabila nahiabuna gabie vaveve ke bahata hilokai avuemo lulele balugai.

<sup>11</sup> Di esebuluta usege di huhuihuhui di hoto keu esebulue huhuihuhui esebulue hoto. Isito di aike kosi baluga holiiale kemo esebulue vaveve ke bahata di halenu. <sup>12</sup> Nahi aike Dilava elehaholisito vaveveve ke unaha hilokalu. Isito nahiabuna gabie nahie nitela Dilava elehai vaveveve kemo lulelelahai. Di aike luleleamale keu esevehame.

Isito Dilavau aike di vaveve bahata hilokamale ke nahate dana gabie Dilava vaveve bahata hilokai lulele balugai. <sup>13</sup> Nahi aike vaveve abuita igae-tamo uma. Vaveve moleike nahie evievi. Vaveve moleike nahi ono vadeu vanie gabimo lohoveve huhulahamale. Isi vaveve moleike nahi moleho isivilahai mole tedaevemale. Isito vaveve abuita igaeta kebiamo moleho isivilahai mole tedaevemale keu balugataho.

## 14

### *Munana Tumue vaveve degomole*

<sup>1</sup> Katealemo moleho isivilahai mole tedaevemale kemo negolahave. Isi Dilava vuvune vaveve kebiata huhulahai kebiamo negolahave. Isito di isivi balugale Dilava hotoe dua loui ata haivei kemo negolahave. <sup>2</sup> Ata moleu hoto nimoletemo guliguliai hoto louale keu ataho louholisito Dilavahoike au ke louma. Kosealemo ataeau hotove ke hilokaholilu. Isito Munana Tumue vuvunemoike au Dilavau au vaveve mahogovale ke louma. <sup>3</sup> Ata oleu Dilava hoto loui ata haivemale kena kemo ekalesia tedaevei hoesegevege abuna kemo negolahai ue dua vagei. <sup>4</sup> Ata oleu hoto nimoletemo hoto loulmale keu hoto kemo au ebika unaha tedahoma. Isito ata oleu Dilava hoto loui ata haivemale keu ekalesia bahata tedaevei hoesegevema.

<sup>5</sup> La bahata hoto nimoletemo hoto louge keu duave. Isito di isiviale la bahata Dilava hoto loui ata haivegei. Kosealemo ata moleu Dilava hoto loui ata haivemale keu baluga. Keu ata moleu hoto nimoletemo loulmale ke evihanu. Isito mesoho hoto nimoletemo loulmale ata kena hoto ke ekovehai loui ekalesia bahata haivege

keu duave. Ekalesia bahata keabuna kemo lulelelahai. <sup>6</sup> Di haokuvuia, dana lae lohoniege hoto nimoletemo loui la haivege lana oleve kateai di hoto ke hilokai. Keu anekianu. Isito dana lae lohoi la hotomo Dilava hoto loui lulele hoto loui la haivege lana hoto ke hilokai kemo lulelelahave.

<sup>7</sup> Ke nahate ata oleu gita mesoho bibo hamae dua vage kemo ataeabuna ke evisi eneve hilokai. Isito kena neniai ke hamaholige ataeabuna oleve kateai eneve ke hilokai. <sup>8</sup> Mesoho kibi uvu-male ata kena kibi uvui neniai eneve vaholige tuvali ataeabuna oleve kateai eneve evisi mole bevuevei tualilahai. <sup>9</sup> Iale ke nahate la hoto nimoletemo loui neniai ata haiveholige keabuna oleve kateai la hoto evisi kemo lulelelahai. Lana kateige la hoto ke ihuna uoholisi. <sup>10</sup> Vata komo hoto nimolete moagaeau ua. Ige hoto nimolete kebia biaeau abu hoto ke hilokalu. <sup>11</sup> Isito di ata mole hoto hilokaholiale kemo au daho louge dana kemo dolodoloai. Isi dana data di hotomo louge ata kena avuta kemo dolodoloai. <sup>12</sup> La la ebika unaha huhuevei isiviale Munana Tumue vuvune vaveve kebiamo negolahai. Keta duave. Isito di isiviale la kebiamo negolahai ekalesia bahata tedeavei hoesegevege abu negolahai.

<sup>13</sup> Katealemo ata oleu hoto nimoletemo loulale kena Dilava imihage Dilavana vuvune omige auna hoto ke ekovehai ihuve loui. <sup>14</sup> Dana hoto nimoletemo Dilava imihai guliguliage di uvuna avuemo ui. Isito di huhuihuhuina kemo uoholige di bae kemo lulelealivebene. <sup>15</sup> Katealemo dana vadeai. Dana di uvuta di huhuihuhuitamo guliguliai Dilava imihai. Isi di uvuta di huhuihuhuitamo nogoli loui Dilava hoesehavo. <sup>16</sup> Lana la uvu unahata

guliguliai Dilava hoesehavoge Dilava vavevemo luleleholiale kena oleve kateai la guliguli ke evisi luleleai loui kosea, “Hoto keu seleve.” Keu anekianu. Kosealemo la hoto nimoletemo guliguliage ata keu ke evisi kemo dolodoloanu. <sup>17</sup> Mesoho lana katelahai hoto molemo guliguliai Dilava hoesehavo dua vai. Isito ata molena oleve kateai la guliguli ke hilokai kemo luleleai.

<sup>18</sup> Dilavau vuvune daomale kemo di hoto nimolete moagamo hoto loui la bahata evigevenu.

<sup>19</sup> Isito dubue guligulimo dana hotoeabemo hoto moaga vesite loui ata haivege abu kemo luleleage keu duave. Isito dana hoto nimoletemo hoto moagamoaga loui ata haivege keau kemo dolodoloage keu toelanu.

<sup>20</sup> Di haokuvuia, lainaho eseese huhuihuhui nahate valive. Isito eseeseau vaveve toelamo negoholimale ke nahate vave. Isi la huhuihuhui kemo kosie huhuihuhui nahate vave. <sup>21</sup> Bukae Hotou loui avoe,

“Kosiveu loui avoe,

‘Dana hoto nimolete loumale ata hanavege abuna tiliege di hoto loui di ata haivei.

Dana hoto nimolete loumale kebia hanavege abuna tiliege di hoto loui di ata namigevei.

Isito abu bae ke evilivebene.’ ”

<sup>22</sup> Bukae Hotou louale ke ihuu koseanu. Ekalesiau hoto nimoletemo guliguliai isiviale evieviholimale keabuna ke evisi loui kosea, “Dilava vuvunemoike abu ke vama.” Isito abu Dilava hoto loui isiviale evievi ataeau ke evisi hoto kemo negolahai.

<sup>23</sup> Katealemo ekalesia bahataeabuna mole bevuevei igaetolahai hoto nimoletemo loui guliguliasege luleleholimale isime evieviholimale ata

keabuna dubue uvue loholiege hoto ke evisi loui kosea, “Tilogo ataeabulike.” <sup>24</sup> Isito ekalesiau Dilava hoto loui mole haivesege evieviholimale mesoho luleleholimale keabuna loholiege hoto ke evisi loui kosea, “La hoto kateale louge no ke evisi hilokage noeau vaveve toela vamale ataea.” <sup>25</sup> Ige hoto kemo abu abu uvumo huhuai mahogovamale kena dailahai. Ige keabuna vaveve toela ke halevai abu kome bokolahai Dilava hoesehavoiloui kosea, “Seleveta Dilavau lahehi uma.”

*Oleve kateai dubumo guliguliveve deiada*

<sup>26</sup> Di haokuvuia, di hoto louale keu koseanu. La igaetoai guliguliasége ata molena nogoli loui ata haivei. Ige ata molena Bukae Hotomo loui ata haivei. Ige ata molena Dilavaemo hoto male ke loui. Ige ata molena hoto nimoletemo hoto loui. Ige ata molena hoto nimolete ke ekovehai ihuve loui. Isito vaveve ke bahatamo ekalesia tedeavei hoesegeveve. <sup>27</sup> Mesoho ata degomoleau isiviai hoto nimoletemo hoto louliho valiege ata abuita mesoho abuita igaetaeau hoto ke loui. Isito keau mole nenita hoto loulivebene. Isito molena hovelahai hoto louge molena hoto ke ekovehai ihuve loui ata haivei. Ige molena hovelahai hoto loui. <sup>28</sup> Isito hoto ekovehai ihuve loulmale atau uoholige hoto nimoletemo loulmale keau bae hoto loulivebene. Isito keabuna tobekai ui abu uvumo Dilava huhulahai ke imihai. <sup>29</sup> Ige Dilava hoto loui ata haivemale ata abuita mesoho abuita igaeta keabuna Dilava hoto loui ekalesia haivei. Keau katelahage ekalesia keabuna hoto ke evisi abu ebikaho huhulahai. <sup>30</sup> Ige mesoho Dilava hoto ekalesia mole uvumo doba selevelage Dilava

hoto loumale keabuna hoto halevai. Ige ata kena hovelahai Dilava hoto ke loui. <sup>31</sup> La igaegaeai Dilava hoto loui mole haivege ekalesia bahatae-abuna kemo lulelelahai negolahai. <sup>32</sup> Dilava hoto loumale ata keau bae bahata mole nenita hoto loulivebene. Isito keabuna mole hemevei igaegaeai hoto loui ekalesia haivei. <sup>33</sup> Kosealemo Dilavau isiviholiale la mole nenita hoto louge ekalesia ataeau evisi dolodololahaliho. Isito keu isiviale la mole hemevei igaegaeai hoto louge elike ataeau evisi lulelelahai.

Dubu bahatamo ekalesia vaveve keu koseanu. <sup>34</sup> Dubue guligulimo keateau bae sevesi mai hoto loui ata haivelivebene. Diue menaka keu subuta hoto kateale lounu. Avoe, “Keateau bae hoto loui malaha haivelivebene.” <sup>35</sup> Keate keau sevesimo hoto mole evisi hilokaholiliege abu lako dubumo hoto lougelive. Isito oe talive hoto kemo abu kolivu belagevei. Kosealemo keateau sevesimo hoto loui ata haivege keu toelanu.

<sup>36</sup> La huhulahai kosea, “Dilava hotou noemo umukanu.” Isi huhuai kosea, “Dilava hoto keu no unahae lohonu.” Kateike la vai keateau sevesi maveve kemo di hoto loualemo isiviholilu. <sup>37</sup> Mesoho laemo atabeu huhuai loui kosea, “Dau Dilava hoto loumale ata. Dau Munana Tumue vuvune vaveve kemo negoanu.” Keu kateige di isiviale hoto mole ko louge au hilokai. Di laheho hisaliale kou di hoto holioholinu. Isito Kosive hotoike. <sup>38</sup> Katealemo ata keu di hoto ko evioholige lainaho hotove evigelive.

<sup>39</sup> Di haokuvuia, di hoto mole louge evive. La uvu bahatamo negolahai Dilava hoto lougeve. Isi hoto nimoletemo hoto loumale kebia humaha



lainaho bamugelive. <sup>40</sup> Vani bahata la guligulimo vaveve dua unaha vai mole hoesegevei tigeve.

## 15

### *Iesuu hatisi hovelahale deiada*

<sup>1</sup> Di haokuvuia, di subuta lae tiale hotoe dua loui la haivege la hoto ke evisi malu. Isi aike kemo negolahai uma. Katealemo di isiviai tota hotoe dua loui la haivei. <sup>2</sup> Di hoto ke loui la haiveale ke matahae dua vave. Lana hoto ke matahae dua vage Dilavana la malevei. Ke matahae dua vaholige Dilavau bae la malevelivebene.

<sup>3</sup> Keliso hotoe dua di mai lae tiale la haiveale keu koseanu. Bukae Hotou louale ke nahate Kelisou nahie toelae ibinaho hatinu. <sup>4</sup> Au hatige Bukae Hotou louale ke nahate abu mai abavuge vani abuita igaeta uoholisege au hovelahanu. <sup>5</sup> Hovelahai tiale au ebika mai Bita haivuito vani molela bae au ebika mai abostolo tuelo (12) kebia haivege abu elehalu. <sup>6</sup> Ige vani mole evievi ata vai handele (500) keau igaetoai usege Kelisou tiale au ebika mai haivege abu elehalu. Evievi ata kebi-amo degomoleau haluvilu. Isege degomoleau ua. <sup>7</sup> Ige vani mole au tialeu au ebika mai Diemisi haivui au esemu bahata haivege abu elehalu.

<sup>8</sup> Ige Kelisou gabila au ebika mai di haivuge di ke elehanu. Evievi ata keau vasohuta Keliso elehalu. Isege di gabila ke elehai abostolove ata holinu. <sup>9</sup> Isito dau abostolo ata kebiamo baluga holioholinu. Di isiviholiale keau daho loui kosea, “Abostolo ata.” Kosealemo di subuta Dilava ekalesia aiogevei vatehani ovema. <sup>10</sup> Isito Dilavau daho uvuai di ebagemage di abostolove

holinu. Keu daho uvuai di ebagemage di u unahamale holioholinu. Isito Dilava lovimo di negoai abostolove degomole evigevenu. Di isivimo di lovi ke vaholima. Isito Dilavau daho uvuai di tedahoge di lovive ke vama. <sup>11</sup> Di hoto loui la haivema. Isege abostolo degomole keau hoto loui la haivema. Hoto ke igaeike no loui la haivemale ke la evisi malu.

*Haluvimale keabuna oleve kateai hovedevei.*

<sup>12</sup> No hotoe dua loui ata haivei loui kosea, “Keliso keu hatihatimo hovelahanu.” Isito la degomoleau loui kosea, “Haluvimale keabuna oleve kateai hovedevei.” <sup>13</sup> La hoto ke louale keu selevevatege Keliso keu hatihatimo hovelahaholinu. <sup>14</sup> Keliso keu hatihatimo hovelahaholivateges no hotove loui ata haivemale ke ihuu uoholinu. Ige la evievi ke ihuta uoholinu. <sup>15</sup> Di kemo hoto mole louge evive. No la haivei loui kosea, “Dilavau hatihatimo Keliso etuvage keu hovelahanu.” Isito la degomoleau loui kosea, “Haluvimale keau bae hovedevelivebene.” La hoto ke louale keu selevevatege no hoto loui la haivemale keu loboe hoto. <sup>16</sup> Kosealemo haluvimale keau hovedevaholivateges Dilavau Keliso etuvage hovelahaholinu. <sup>17</sup> Isime Dilavau Keliso etuvage hovelahaholivateges la evievi ke ihuu uoholinu. Ige la toela keu sohu laemo ua. <sup>18</sup> La hoto ke louale keu selevevatege evievimo haluvimale keau haluvisi uoholilu. <sup>19</sup> Nahi nahie evievi Kelisomo mavoi ehue tiveve keu uoholivateges evieviholimale keau nahi elegevevei loui kosea, “Ata kebia nohovu. Keau loboe hoto ke evisi ehovamale.”

<sup>20</sup> Isito hoto seleve keu koseanu. Dilavau hatihatimo Keliso etuvage hovelahanu. Kelisou hovelahale kemo nahi hilokage novae uveve ke unahau uoholiholinu. Isito nahiabuna hovedevei ukolikoli malei. <sup>21</sup> Hatihati keu ata igaemo lohonu. Ke nahate hatihatimo hovelahamale keu ata igaemo lohonu. <sup>22</sup> Nahi bahataeau Adamumo loholu. Isi Adamu vaveve toela vale kemo nahiabuna bahata haluvigei. Isito nahi Kelisoluvuta igaetolahale kemo nahiabuna bahata hatihatimo hovedevei. <sup>23</sup> Hovedeveveve kemo Kelisou vasohuta nahiho hovelahanu. Ige ivivemo haluviale keabuna emo au lohomale kela bae abuta hovedevei. <sup>24</sup> Vani kela Kelisona au vuvunemo vuvunete bahata aiogevege abuna uoholisi. Otogoe umale vatae umale kebia bahata evigevege keabuna vuvuneve valae ui. Ige Kelisona au vuvune mai au Mama Dilava omisi avuho loui kosea, “Di ata bahata nalievenela.” <sup>25</sup> Kelisona kebia nalievelage Dilavana aiahavomale kebia bahata aiogevege vuvuneveabuna uoholisi. <sup>26</sup> Dilava aiahavomale kebia vuvunetana uoholige hatihati ke vuvunetana uoholisi. <sup>27</sup> Bukae Hotou louale keu kateanu. Avoe, “Auna vuvunete bahata evigevei.” Isito nahi kemo hilokage au bae Dilava evihalivebene. Kosealemo Dilava keike vuvune bahata malei Keliso ominu. <sup>28</sup> Dilavau vuvune bahata malei Keliso omige auna Dilava aiahavomale kebia bahata aiogevege uoholige auna au vuvune bahata malei Dilava omige auna au vuvune igaemo au ata bahata nalievei.

<sup>29</sup> La degomoleau loui kosea, “Haluviale keau bae hovedevelivebene.” Isito oleva katealemoike la haluviale kebiaho babatisolahama. Kosealemo nahi hilokage haluviale keabuna bae hovedevei.

<sup>30</sup> Haluvimale keau hoveveholige vadeuhoike no vani bahata vatehani malema. <sup>31</sup> Di haokuvuia, vani bahata hatihatie vaveveu daemo lohoma. Nahiau nahie Kosive Iesu Kelisoluvuta igaetolahamale kemo di la vahaeho vai hoto kateale loui la namigevema. <sup>32</sup> Di kove ui Dilava lovi vasege Evesasi atae toelaeau ovo aihanite nahate vai di aihavoma. Isito haluvimale keau hoveveholige vadeuhoike di ata kebiamo vatehani malema. Haluvimale keau hoveveholige nahi nahie isivi unaha vai lovi isi e isi u unahi. Nahi katelahaito vani mole haluvisi uholisi.

<sup>33</sup> Ata degomoleau hoto kateale loui la lobegevema. Isito lainaho hoto ke evilive. Lana hoto ke evisi ehoveliege la vaveve dua halevai vaveveabe toela nahate vave. <sup>34</sup> Iale la vaveve toela halevai huhue dua vai vaveve inutolotolote vave. La degomoleau Dilava humaha hilokaholilu. Di ke loui la mati vanu.

*Haluvimale keabuna hovevevei vava oleteale mai.*

<sup>35</sup> Mesoho la molena di belahai loui kosea, “Haluvimale keabuna oleve kateai hovevevei. Abuna hovevevei vava oleteale mai.” <sup>36</sup> Dolodolo halevave. Lana lovie i mai vatamo hage visovena ulisi baie doga mamosege ivena sakavai uholisi. <sup>37</sup> Lana kone i mesoho i degomole haliege la bae mesoho avata ive ke bahata malei halivebene. Isito lana ive ke unaha hage auna ulisi. <sup>38</sup> Dilavau au isivimo i igaegae oleve kateai uliveve kebia ovealemo keabuna abu vaveve kemo igaegaeai ulisi.

<sup>39</sup> Ke nahate onobenobeau vatamo umale keau vava igae holioholilu. Atae vava keu mole. Ige

ovoe vava keu mole. Ige ugue vava keu mole. Ige huenae vava keu mole.

<sup>40</sup> Ke nahate otogoe onobenobe isi vatae onobenobe keau mole nahate holioholilu. Otogoe ataga otogoe elehilehi keu mole. Ige vatae elehilehi keu mole. Keau mole nahate holioholilu. <sup>41</sup> Vani ke elehilehiu mole. Ige bata ke elehilehiu mole. Ige didi ke elehilehiu mole. Ige didi kebiamole elehilehiabe keau nimolete.

<sup>42</sup> Iale ke nahate haluvimale keabuna hovevei vavae doge malei. Halege vavaeabe malei abavuge abu sakavai. Isito keau vavae sakavamo bae hovevevebene. Keabuna hovevei vavae doge malei. <sup>43</sup> Ataeabuna haluvige vavaeabe elehilehi kena toelage negoeabena abuemo uoholisi. Isito abuna gabie hoveveve vavaeabe elehilehi kena negoai duaveai. <sup>44</sup> Haluvimale kebia vavau vatae vava. Isito keabuna hovevei otogoe vava malei. Nahi hilokage vatae vavau ua. Ige kemoike nahi hilokage otogoe vavau ua. <sup>45</sup> Bukae Hotou loui avoe, “Dilavau subuta Adamu vage keu vatae ata holisi ua.” Isito vani mole Dilavau Keliso hanavoge au otogomo lohonu. Ige kemo ataeau uveve doge malelu. <sup>46</sup> Nahi nova otogoe vava maleholisito nova vatae vava malelu. Isito nahi-abuna bae gabie otogoe vava malei. <sup>47</sup> Dilavau subuta vatamo Adamu vanu. Isito gabie Kelisou lohoale keu otogomo lohonu. <sup>48</sup> Adamu vatamo lohoale kemo ataeau vatae vava malelu. Isito Kelisou otogomo lohoale kemo atave keabuna otogoe vava malei. <sup>49</sup> Nahiau Adamuemo vatae vava malelu. Isito gabie otogomo lohoale Keliso ke vava nahate nahiabuna malei.

<sup>50</sup> Di haokuvuia, di louale keu koseanu. Vatae vavata nahi bae Dilava otogoe matama keve talivebene. Vatae vava kena vatamo sakavai ui. Katealemoike nahi bae vatae vavata otogoe talivebene.

<sup>51</sup> Dilavau hoto mole mai mahogovale ke dana aike louge evive. Nahi degomoleabuna halu-visege degomoleabuna usege Iesuna lohoge nahi bahataeabuna vavae toela halevai vavae dogma lei. <sup>52</sup> Vanie gabila kibiuhotoige solekavesite nie vaga hamale ke nahate haluvimale keabuna hovedevei vavae dogma lei. Ige nita umale kebiatae abuna vavae dogma lei. <sup>53</sup> Vani kela nahiabuna vatae vava halevai vavae dogma lei. Nahiabuna haluvimale vavae toela halevai vavae dogma lei kemo vani bahata ugei. <sup>54</sup> Vani kela nahiabuna vatae vava haluvimale ke halevai vavae dogma lei vani bahata ugei. Ige nahie vaveve kena Bukae Hoto mai selevelitisi. Hoto keu loui avoe, “Kelisou hatihatie vuvune ke aiohavoge ukolikolie vuvune keu negoai hatihatie vuvune ke evihanu.” <sup>55</sup> Bukae Hotou tota kemo loui avoe,

“Hatihati, a vuvuneike oleve ke.

Hatihati, a negoike oleve ke.”

<sup>56</sup> Nahi hilokage vaveve toelamoike hatihati keu vuvuneanu. Ige menaka kemoike vaveve toela keu negoanu. <sup>57</sup> Isito nahie Kosive Iesu Keliso ke vuvunemo Dilavau nahi hoesegevege nahi vaveve toelata hatihatitamo negolahalu. Kemo nahi vahaehoai Dilava ivi hoesehavogei.

<sup>58</sup> Di uvue haokuvuia, lainaho hoahoalive. Isito negolahai lavive. Vani bahata Kosive lovimo negolahai lovie dua vageve. Kosealemo la hilokage

la Kosive lovi vamale keu lovi unaha holioholinu. Isito la vamale ke ihuu ua.

## 16

### *Obelenimo Dilava ata tedaeveveve*

<sup>1</sup> Di aike obelenie hoto louge evive. Di Gale-sia ekalesia namigeveale ke nahate vai Dilava ataeau Diudiae umale kebia tedaeveve. <sup>2</sup> Bula bahata la ibina malemale ke badi mole malei obeleniho otovege au ui. Ige di bae lohoniege moni maleveve hoto loulivebene. <sup>3</sup> Isito dana bae lohoi la ata oletebia tabageveale kebia deiada loui levalevamo hisaliai mai ovege abuna monita levaleva keta malei tai Dielusalema ata kebia ovei. <sup>4</sup> Di hilokaholinu. Mesoho di tige abu isivialiege bae daluvuta tai.

<sup>5</sup> Isito dana vasohuta Masedonia vatae taito bae hoilahai la elegevei. <sup>6</sup> Dana lae lohoniege mesoho vaganamo lahehi uniege vaeahamo tota oai tiho vage lana di tedahoge dana tota oai o moleve tai. <sup>7</sup> Di isiviholinu lae dei ai lohoi vanie ni moaga vesitehame lahehi uliho. Isito Kosiveu humaha alavoge di isiviale vani moaga lahehi ui.

<sup>8</sup> Di aike oai talivebene. Isito dana Evesasi o kove uniege Diue vahaeho vani Bentikosi keu uoholisege dana halei oai tai. <sup>9</sup> O kove Kosiveu au lovie udaha dah o alavoge dana kove uniege Kosive lovi ke baluga vai. Di aiohavomale ata moagaeau kove ua. Isito dana kove ui lovi ke vaito bae tai. <sup>10</sup> Isito mesoho Timotiu gabie lae lohoge ke hoesehavo i mai o hatuve. No keti Kosive lovi vama. <sup>11</sup> Lainaho ke elehai huhulahai kosea, “Kou kosi holioholinu.” Isito ke hoesehavo i tedahoge auna vahaehota hoilahai

dae lohoi. Ige no evievi ata degomolehi ke elehai vahaeholahai. <sup>12</sup> Dana aike nahie haoka Abolosi kemo hoto louge evive. Di isivi balugale Abolosi keu evievi ata degomole holoevei lae dei ai tai. Isito keu ke huhuai isiviholinu aike lae taliho. Isito vani molela auna bae lohoi.

### *Bolo hotoe gabi*

<sup>13</sup> La ebika nenigeveve. La evievimo negolahai lavive. Lainaho vabulahalive. Isito hovevevei negolahai lavie tumu vave. <sup>14</sup> La vaveve bahata vamale kemo moleho isivilahai mole tedaeveve.

<sup>15</sup> La hilokage di Giliki vatae tiale ata haivege Sitevanasiu ovemo umale ata kebiahi vasohuta di hoto ke evisi evievi ata holilu. Ige gabie ata degomoleau vata keve evievi ata holige Sitevanasiu au oe ata kebiahi Dilava ata kebia tedaevei hoesegevema. <sup>16</sup> Di haokuvuia, di isivialeike la ata kebia vaveve nahate vai tedaevegei. Isi ata degomoleau ata kebia nahate vai Dilava lovi vamale kebiata tedaevegei.

<sup>17</sup> La keve usege Sitevanasi, Votunaitasi, Akaikasi ata keau la lovo mai lohoale la vaveve loui di haivuge di ke evisi vahaehoanu. <sup>18</sup> Keau la vaveve loui di mai vahaehotilu. Isi keabuna hoidevei abuta di vaveve loui la malevei vahaehotievei. Katealemoike ata katealebia hoesegevei iviabe tabageveve.

<sup>19</sup> Esia vatamo umale ekalesia keau laheho vahaeho hoto ko hanavolu. Ige Akuilau abu mahina Bisilati laheho vahaeho hoto ko hanavolu. Ige ekalesiau oabemo igaetolahai guligulilahamale kebiata laheho vahaeho hoto ko hanavolu. <sup>20</sup> Ige evievi ataeau kove umale keau bahata laheho



vahaeho hoto ko hanavolu. La mole elegeveliege mole vahaeho vai mole ada hatueveve.

<sup>21</sup> Bolo daliko aike di adata vahaehoe hoto ko hisaliai laheho hanavonu.

<sup>22</sup> Ata olena nahie Kosive keho isiviholige Dilavana ke aiohavo. Kosive, no isiviale solekai loho.

<sup>23</sup> Di isiviale nahie Kosive Iesu keu vani bahata la huhuevei la hoesegevegei. <sup>24</sup> Di hotoe gabilike ko. Iesu Keliso kemo di uvu bahatau laemo ua.

**Buka Tumute**  
**The New Testament in the Mountain Koiali Language**  
**of Papua New Guinea**  
**Nupela Testamen long tokples Maunten Koiali long**  
**Niugini**

copyright © 1981 Wycliffe Bible Translators, Inc.

Language: Mountain Koiali (Koiali, Mountain)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-26

---

PDF generated using Haiola and XeLaTeX on 11 Nov 2022 from source files dated 9 Oct 2020

db58c592-1903-54ff-a424-991321fd5949